

Cun in «Viva» sin Flurin

Il Chor mischedau Laax cuntinuescha il project «150 onns Flurin Camathias»

■ (fmr/abc) **Dacuort ein cantaduras e cantadurs puspei s'entupai. Cun ina sera da cumpignia ha il Chor mischedau da Laax relantschau ina part dil program giubilar pil poet Flurin Camathias.** Ils 6 da mars 2020 ei stau il 149avel gi da naschientscha da Flurin Camathias. La sera avon era il chor da project s'entupaus a sia emprova jamnila dil program. Il Chor mischedau da Laax cul dirigent *Rest G. Tuor* haveva entschiet dus meins avon ils exerchezis per «Viva Flurin!» In'jamna pli tard, la gievgia dils 12 da mars, era la pandemia pli avanzada. Ch'ei seigi per varga sis meins la davos'emprova havess negin spitgau. Il gi suenter han las autoritads cantunales e federalas decretau il «lockdown». L'jamna vargada, in miez onn pli tard, ha la suprastonza dil chor envidau ad ina sentupada ed annunziu che las emprovas cuntinueschien. Il president *Erwin Ardüser* e sias consuprastontas *Rita Bass*, *Catia Tschuur* e *Carlina Caviezel*, ensemen cul dirigent *Rest G. Tuor*, han decidu ch'igl ei responsabel da cuntinuar. Secapescha cullas mesiras da corona, vul gir distanza duida e plaz avunda ell'aula dalla casa da scola enstagl ella sala dalla Sentupada.

Era in chor d'affons

Igl atun vegn il comite d'organisaziun a saver decider definitivamein tgei projects

ch'ins sa propi realisar. Eventualmein stoppien ins desister ni redimensiunar ina ni l'autra caussa, ha *Ardüser* remarkau. En scadin cass ei il concert communal dil chor viril e chor mischedau previus sil gi exact dil 150avel anniversari da Flurin Camathias. Il termin ei ideals, igl ei la sonda dils 6 da mars 2021.

Aposta per render honur al grond poet sursilvan han ils dus chors da Laax entschiet il schaner 2020 ad exercitar il program cun cumposiziuns novas da *Gion Balzer Casanova* e *Gion Andrea Casanova*. Era in chor d'affons vulan ins formar sil giubileum. *Rinaldo Camathias*, oz cantadur profilau, ei staus sez biars onns commember dil chor d'affons da Laax. El vegn a direger e menar quei project parzial. Il chor d'affons duei sepresentar per l'emprema gada a caschun dil concert giubilar dils 6 e 7 da mars 2021.

Il concept «Viva Flurin!» portan e sustegnan biars, denter auter la vischnaunca da Laax, uniuns e scola sco era artistas ed artists dalla regiun. Co ed en tgeifuorma ch'ins sa realisar il cuntegn dil concept vegn a semussar ils proxims meins. Suenter la pausa d'in miez onn ei il comite vidlunder da coordinar e surveglar il concept. Sper il project parzial da cant dat ei manifestaziuns en museum e biblioteca, ei dat installaziuns audiovisualas, ina scartira giubilara, in'exposi-

ziun ambulonta a Laax, Breil, Andiastr e Siat. Previda ei era ina tura auditiva enramada da ramurs e musica, ei dat installaziuns da glisch e las fontaunas dil vitg a Laax vegnan ad esser renovadas sigl onn giubilar da Flurin Camathias.

L'jamna vargada, alla sera da cumpignia, ha la suprastonza dil chor mischedau vuliu trer «ord las taunas» cantaduras e cantadurs. Igl ei semussau che las

mesiras ordinadas dallas autoritads, cun distanza duida, fan negins fastedis. Era sch'igl ei buca pusseivel da cantar senza fin duront ina tala sera entuorn meisa han tuts presents giu tschaffen da tgirar puspei inagada ils contacts socials. Per sluccar e tuchegiar ha il president organisau in legher quiz «Flurin Camathias» cun diesch damondas entuorn il poet e sia biografia.



La suprastonza dil Chor mischedau da Laax ei da buna speranza pil project giubilar «Viva Flurin!»: *Carlina Caviezel*, *Rest G. Tuor*, *Rita Bass* ed *Erwin Ardüser*. Silla foto maunca *Catia Tschuur*.

FOTO AUGUSTIN BEELI